

Проложное Житие святой Ольги по списку XVI века

*МЕСЯЦА ИЮЛЯ В 11 ДЕНЬ ПАМЯТ СВЯТЫА БЛАЖЕННЫА ВЕЛИКИА
КНЯИНИ ОЛГИ, НАРЕЧЕННОЙ В СВЯТОМ КРЕЩЕНИИ ЕЛЕНЕ РУСКОИ*

Святая великая княгиня Ольга родися в Плесковской стране, в веси зовомыя Выбуто, отца имеаше неверна сущи, також и мать некрещену, от языка варяжска и от рода не от княжска, ни от велмож, но от простых бяше человек. О имени ж отца и матери писание нигдеж изъяви. Образом бяше святая тиха и кротка и любима ко всем и мудра зело. Посем князь руски Игур поня ю за ся за премногую ея добродетель и добронравие, по времени ж родися сын има Святослав, еще бо в неверствии има сущи. Посем древяне убиша великаго князя Игуря, сыну ж его Святославу в то время еще младу сущу, оста отца своего и седе в Киеве. Святая же княгиня Ольга по смерти мужа своего Игоря просвещена бывши Божию благодатию и иде в землю Греческую, в царствующий град взыскати веры Христовы, иде ж христианство утвердися. И паки пришед святая в царствующий град и испроси от патриарха святого крещения. Посем царь въсхоте пояти святую за ся, поне ж бо мудра бе и красна зело; и абие Божию помощью упремудри царя и глагола: царю, не подобает христианом поганых поимати. Посем царь же с патриархом сам крести своима рукама святую в имя Отца и Сына и Святого Духа, и нарекоша имя ей Елена. И паки поучив ю патриарх от Божественных писании. Посем святая даде патриарху блюдо злато з драгими камыки и ж женчюгом устроено на послужние святому олтарю соборные церкви. И паки царь глагола святеи: пойдь за мя, се уже крещена еси. Святая же глагола царю; не подобно ти есть поняти, понеж породил мя еси в купели святого крещения; царь ж помыслив и патриарх, яко не подобает поняти ей, и даде святеи дары многи царь, тако ж и патриарх и отпустиша ю с великою честью в землю Рускую к людем своим. И посем святая нача требища и кумиры сокрушати по многим местом и в тех место нача кресты Христовы поставляти, кресты ж те Христовы знамена и чюдеса творят и до сего дни, иде ж святая поставила бяше. Посем же святая хожаше по градом и по местом, учаше веры Христове и уроки легкии и дани полагаше на людех. И паки прииде святая на место Плесковы реки и Великие, и възлюби место вельми, бяху бо на месте том лес велик и дубровы многи, и ту виде лучю Трисиятельнаго Божества и на месте том крест постави, крест же той стоять и до сего дни в память святыа. Святая ж пророчески глагола бояром своим и рече: на месте сем будетъ церковь Святыа Троицы, град же будет велик и славен зело и изобилиа в нем будетъ многа. И посем святая прииде к сыну своему Святославу и живяше с ним; и абие нача святаа учить сына своего Святослава о вере Христове, сын же святыа нимало внят о сем, но хожаше в мнозе силы и пленяше грады и языцы и дани многи пола(га)ше на них, и последи ж

и сам Святослав в неверии убыен бысть от агарян. И посем святая посла много злата на Плесков реку, иде же виде лучю Трисиятелнаго Божества на поставление церкви Святыя Троица. И посем по крещении поживе лет 15 и угоди Богу и с миром предав святую свою и честную душу в руце Христу Богу в лето 6477, месяца июля в 11 день. И посем времени многу минувшу по преставлении святыя внук ея блаженный князь Владимир възпомяну о мощех святыя бабы своеа и прииде на место сам с митрополитом и со всем священным собором и с фимяном, и раскопавше землю и обретоша честныа мощи святыя бабы своеа княгини Олги целы и нерушимы пребываютъ. Они ж прославиша Бога и въземъше мощи и положиша в церкви Святыя Богородица в гробе каменеа мале и на верху гроба того честнаго оконце сътвориша, и туде видятъ блаженныа тело лежаше цело и тлению непричастно, но светяшеся яко солнце. А иже кто приидет с верою ко гробу святыя, и оконце оно, иж на гробе святыя, само о себе отверзется, и видят честное тело и мнози приемлют исцеление неоскудно, а другим, иже не с верою приходящим к честному ковчегу святыя, не отворится оконце гробное и не видят святаго и честнаго ея тела, но токмо гроб видяху святыя.

(Приводится по журналу: Журнал Московской Патриархии, 1969, № 7, с. 73—74.

Опубликовано Н. Серебрянским в книге: Древнерусские княжеские жития (Обзор редакций и тексты).— М., 1915. с. 8—12)